

痛史  
第十四種

海上見聞錄

二



# 海上見聞錄卷二

鷺島道人夢芥輯

順治十七年 海上稱永歷十四年

正月二十一日報。滿州統兵將軍達素頭站兵至福州。二月。賜姓弔回北汛諸提鎮。候撥防守。三月。報達將軍已到泉州。催促船隻配兵。賜姓弔回南下官兵。分派屯紮。四月初二日。改右提督馬信爲提督軍驍騎鎮。又傳令各提鎮將令官兵眷口。搬住金門所。委英兵鎮陳瑞保護。同戶官鄭泰一同照管。初四日。遣中衝鎮蕭拱宸等治崇武。堵禦泉港。委輔明侯林察爲水師總督。共商機宜。派援勦右鎮林順、禮武鎮林福、防守海門。派右武衛周全斌、驍騎鎮馬信、防治裂嶼尾。派游兵鎮胡靖、殿兵鎮陳璋、爲陸師。守高崎等處。援勦後鎮張志爲水師。拋泊高崎應援。撥林福防守倒流寨。二十六日。泉州清船二百餘號。駕到洋芝灣。陸路兵山上

紮營放礮。船依山邊而行。遂進至圍頭。賜姓令林察、蕭拱宸等泊劉五店。遏止圍頭。清船不得入同安港會合。行戶官鄭泰將前派守圍頭官兵船隻一盡防守金門。拋泊城保角。以防廣海許龍等船。撥右虎衛陳鵬守五道高崎等東一帶。撥援勦前鎮戴捷守高崎寨。殿兵鎮陳璋、前衝鎮劉俊、智武鎮顏望忠守澗保寨。并赤山坪遊兵鎮胡靖防守東渡寨。委戎政王秀奇、總督高崎等處協理戎政楊朝棟、總督東渡等處。臨期商酌調遣各鎮管理外。又令神武營康彥邦紮崎尾。兼管神武一帶地方。更撥宣毅後鎮吳豪、後衝鎮黃昭、援勦後鎮張志、并陳廣、吳裕、水師。應援高崎五道等處。堵禦邀擊。五月初一日。賜姓駐演武臺。撥忠靖伯陳輝、同安侯周瑞、援勦右鎮下楊元標統船。前提督下方左榮等泊船海澄港。以截漳州大隊水師。初三日。賜姓親督前提督黃廷、右武鎮周全斌、援勦左鎮黃昌、右鎮林順、正戎旗鎮楊富等在海門準備迎敵。初八日。漳州港內先遣大船一百號。配以漢兵。部院李率泰、同海澄公黃梧督之。出海澄港。同安港收拾小船。滿將軍達素、同同安總鎮施琅。

配以滿兵。橫渡高崎。俱下船。約初十日進兵。初十日。賜姓令五軍陳堯策傳諭陳輝等。安泊中流。不許起舵。欲待漳州船出而乘其後。倏忽間。滿船乘風順流蔽江而下。以數船攻一船。用鐵鍊釘住。破矢齊發。梯而登。陳堯策、周瑞一船。及左方榮一船。皆被燒殺。陳輝一船。滿兵蜂擁而上。輝走入官船。發火藥從下衝上。船火飛烈。滿兵在船上者俱死。其船未沉。爲官兵奪回。陳輝得活。時賜姓坐煩船。繼令何義督之。而下入槳船。往來督戰。時滿兵乘潮直進。海船漸漸退走。直壓至廈門港口。將午。南風大發。海潮漸漲。黃廷、周全斌等奮力迎擊。回正副龍煩兩船。破躲而入。龍煩受大彈子一丸。重十餘斤。小彈子一斗。副龍煩照樣新鑄者。各以一船專載之。龍煩所及。船中之人。頃刻不見形骸。遂奪滿先鋒昂邦、章京、紅眼二船。出橋侍衛一二等下十餘員。并烏沙一船。黃廷擒梅勒、耿勝一船。戶官鄭泰、白金門率烏船五十號。乘勢衝入。宣毅鎮黃元從鼓浪嶼後衝出交攻。砲聲如雷。隱隱不絕。煙火迷江。咫尺不辨。共擒滿船十三號。滿先鋒三船被追至圭嶼。棄船登岸。馬信招之皆降。夜溺殺之。惟留紅

帶梅勒士心秀、隨身披甲二人。是日辰時。達將軍總督滿漢兵船。至牟尼嶼赤山坪登岸。殿兵鎮陳璋揮兵於水中逆戰。兵少漸不及支。守高崎右虎衛陳鵬密通同安施總鎮。謀爲內應。其左營陳蟒璋之姪也。見勢急。欲出兵救援。陳鵬止不許。總督王秀奇速令陳蟒赴之。滿兵見金龍甲兵至。以爲迎已也。及下水砍殺。始慌亂。而前協萬宏、領兵林雄、領協鎮劉雄、繼至合擊。前衛鎮劉俊亦從東衝出。協力拒殺。俄而吳豪起至。滿船向前迎敵。諸水師分路衝下。擊沉數隻。滿兵先登岸者被殺。及溺水者不計。生擒巨馬喇及披甲三百餘人。皆斷掌放回。將軍達素率殘兵回省。數日後屍浮海岸。長髮者十二。短髮者十七。八。賜姓礫陳鵬。并殺其家屬。以陳蟒爲虎衛右鎮。以何義爲虎衛左鎮。六月。賜姓駐金門後浦。令思明州將領官兵眷口移駐金門。百姓搬移過海。聽其自便。撥諸提鎮分紮汛地取糧。七月。命兵官張光啟往倭國借兵。以船載黃蘗寺僧隱元及其徒五十衆。時倭人敦請隱元故載與俱往。賜姓書與倭國王。而不及上將軍主國政者。故兵不發。九月。詔兵民家眷俱回。

思明州。十月。清弔將軍達素回京問罪。素在省吞金而死。滿兵回京。水師船隻俱入港閣岸。監國魯王殂於金門所。

辛丑順治十八年

是歲順治駕崩康熙登極

海上稱永歷十五年

正月。賜姓議取臺灣。其地在東南海中延亘數千里。土番雜處。天啟年間。歐羅巴紅夷占居之。於港口築城。與中國日本廣南貿易。海邊貧民流寓者。種蔗煮糖爲業。殆數千戶。時紅夷亦恐海上動兵。故於庚子春復遣通事舍人何斌及其酋長再來議貢。何斌密進地圖。勸賜姓取之。賜姓陳兵自鎮南關至院東。依山布陣。凡十餘里。甲兵數萬。周全斌統轄戎旗兵七千。皆衣金龍甲。軍威甚盛。夷人震懼。至是進兵。諸將雖不違阻。俱有難色。宣毅後鎮吳豪曾到其地。力言港淺大船難進。且水土多瘴癘。賜姓舍之。惟戎政楊朝棟倡言可取。賜姓納之。二月。賜姓駐金門。整理船隻。以兵官洪旭。前提督黃廷。居守思明州。戶官鄭泰。居守金門所。二月初一日。祭江。賜姓督文武官親軍武衛周全斌。何義。陳蟒。提督馬信。鎮將楊富。蕭拱宸。黃昭。陳澤。吳

豪林瑞、張志等作首程先行。令守澎湖。遊擊洪暄引港。各船俱駕到料羅灣。聽令開駕。二十二日午時。自料羅灣放洋。二十四日。各船齊到澎湖。分各嶼住紮。賜姓紮營內嶼。二十七日。開船到甘吉嶼。阻風而回。三十日晚。風雨未息。賜姓以行糧已盡。傳令一更後開駕。三更後晴。風順。四月初一日天明。賜姓至臺灣外沙線。各船絡繹俱至鹿耳門線外。此港甚淺。沙壇重壘。大船從無出入。故夷人不甚防備。是日水漲丈餘。賜姓下小船。由鹿耳門登岸。午後大艚船齊進。泊水寨港。登岸紮營。令陳澤督虎衛將坐銃船紮鹿耳門。牽制紅夷甲兵船。并防北練尾。守赤嵌城夷長貓雞實町。發礮擊盤營。并舵馬廐粟倉。賜姓恐焚及赤嵌衛。令楊朝棟督張志官兵防禦看守。初三日。陳澤紮營北練尾。守臺灣城夷長揆一。見官兵來齊。遣頭目拔鬼仔。率烏銃兵數百前來衝擊。陳澤迎戰。一鼓殲之。拔鬼仔戰死。餘夷退走。初四日。赤嵌城夷長貓雞實町以城孤救之。賜姓遣楊朝棟招諭之。遂率夷人三百餘民出降。賜姓令赤嵌夷招夷長揆一等來降。不從。時夷人尚有甲板船在港。令陳

澤、陳廣等攻之。沉其一隻。焚其一隻。走回一隻。賜姓督師移紮崑身。築土臺駕礮。攻臺灣城。揆一等於附城。銃城齊放大銃。頃刻土臺崩壞。官兵退回。夷人出城奪礮。馬信、劉國軒率弓箭手射之。乃退。賜姓遂令赤嵌降夷架銃擊城崩之。派馬信等紮臺灣衛。固守不攻。俟其自降。派各鎮分紮汛地屯墾。五月初二日。二程黃安、劉俊、顏望忠、陳瑞、胡靖、陳璋等俱到臺灣。賜姓集文武各營。審宣毅後鎮吳豪搶掠百姓。監匿米粟。斬之。右虎衛陳蟒同罪。網貢革職。以黃安管左虎衛。改赤嵌地方爲東郡。設一府二縣。以府爲承天府。以楊朝棟爲府尹。一爲天興縣。委文烈知縣事。一爲萬年縣。委祝敬知縣事。六月十六日。銅山守將蔡祿、郭義、拾掠居民。脅忠匡伯張進投誠於清。進詐許置酒請會。欲發火藥與之俱焚。蔡郭知之不赴。張進遂放火自焚。初後提督萬禮、密約海澄公黃梧欲據思明州以叛。後隨征南京。被獲而死。已祀忠臣祠矣。及事泄。賜姓出其木主。蔡郭是其黨也。故懼而叛。清兵入銅山城。兵官洪旭會同忠勇侯陳豹、統水師擊之。蔡郭同清兵退走。報至。賜姓拔總監營翁



天祐鎮守。而厚卹張進之家。七月。紅夷會甲板船至。弔右武衛前協黃德掣守臺。灣衛。名其衛爲安平鎮。張志、黃招等、激變火肚杜土番、楊祖與戰。中樑鎗死。土番圍張志營。黃安、陳瑞等、攻破之。八月。紅夷率甲板船來犯。賜姓令陳澤同戎旗左右協水師擊敗之。獲甲板船二隻。小艇三隻。自是甲板船不入臺灣。不敢復出。京中命戶部尙書蘇納海至閩。遷海邊居民之內地。離海三十里。村莊田宅。悉皆焚棄。先是達素兵至。賜姓令思明州搬空。其先人來降者。家眷乘隙皆渡海逃去。原任左提督慶都伯王秀奇逃回江南。埋名不出。原任漳州府知府房星曜者。爲索國舅門館。遂逃入京。使其弟候補通判房星曜上言。以爲海兵皆從海邊取餉。使空其土而徙其人。十版不許下海。則彼無食而兵自散矣。悉從其策。陞房星曜爲道員。病死無嗣。至是上自遼東。下至廣東。皆遷徙築垣牆。立界石。發兵戍守。出界者死。百姓失業流離。死亡者以億萬計。蘇納海歸。薦同安總鎮施琅爲水師提督。移鎮海澄。十月。同安侯鄭芝龍。爲其家人尹文器出首通海。時康熙新卽位。四輔蘇克薩與

龍有隙。以初三日殛芝龍於柴市。又殺其子孫家眷凡十一人。報至。賜姓叱爲妄傳。中夜悲泣。居常鬱悒。十二月。守臺灣城吏長揆一等乞以城歸。賜姓。而搬其輜重貨物下船。率餘吏五百餘人。駕甲板船遠去。賜姓遂有臺灣。改名東甯。時以各社土田。分給與水陸諸提鎮。而令各搬其家眷至東甯居住。令兵丁俱各屯墾。初至。水土不服。疫癘大作。病者十之七八。死者甚多。加以用法嚴峻。果於誅殺。府尹楊朝棟。以小斗散糧。殺其一家。又殺萬年縣知縣祝敬。家屬發配。於是人心惶懼。諸將解體。

寅壬康熙元年

海上稱永曆十六年

正月。賜姓嚴諭搬眷。鄭泰、洪旭、黃廷等皆不欲行。於是不發一船至臺灣。而差船來弔監紀洪初闢等十人。分管番社。皆留住不往。島上信息隔絕。三月。令周全斌調銅山思明州兵攻南粵。欲擒陳豹。豹短小精悍。號三尺陳。守粵近二十年。許龍、蘇利皆畏之。豹驕傲專恣。數違藩令。兵至。庫卒率衆搬眷下船。不敢十分迎敵。揚帆入廣東。投誠。封爲慕化伯。未幾。病疫而死。四月。賜姓遣兵官楊都事到思明州。奉令箭。

欲殺董夫人及其長子經。以與乳母生子之故。洪旭等不肯奉令箭。殺楊都事。而訛傳周全斌奉密諭欲殺諸將十餘人。於是人人自危。洪旭等使周全斌船回廈門港。卽執而拘之。黃昌勸鄭泰殺之。全斌求救於董夫人。洪旭亦依回乃得免。五月初八日。國姓招討大將軍殂於東甯。年三十有九。提督馬信及諸鎮將黃昭等議以其弟鄭世襲護理大將軍印。未幾。馬信、黃安皆病故。世襲以黃昭、蕭拱宸爲腹心。拔劉國軒管鎮事。謀自立。報至思明州。鄭泰、洪旭、黃廷、王官馮澄世、參軍蔡鳴雷等立長子經爲嗣。稱世子。發喪卽位。時靖南耿繼茂移鎮福建。與總督李率泰遣旗中軍王明、賞功李有功至思明州。鄭泰等議照朝鮮國例復耿李。使疏請。而泰遣中軍官楊來嘉同入京待命。後不報。釋來嘉回。八月。京中遣戶部郎中貢岱、兵部郎中金世德、入閩安城招撫。凡海上文武官員投誠者。依例照品級陞降補用。十月。洪旭、鄭泰以兵千餘人配船。送世藩名經入臺灣。世藩以周全斌爲五軍。馮錫範澄世子爲侍衛。陳永華爲諮議參軍。至澎湖。其將李思忠船飄至臺灣。知諸將有謀逃回。世藩隨

卽防備。因乘風入鹿耳門登岸。全斌令連夜伐木爲柵九營。次早黃昭會諸將出兵。值大霧晝暝。跬步不可視。諸將多迷誤失期。惟黃昭兵先至。攻其前。劉國軒兵繼至。攻其後。破營而入。世藩兵却擠而前。黃昭攀木梯而登。爲流矢所中。墜下。全斌令斬其首大呼示衆。軍士皆迎降。大霧忽晴。日已晌午。鍾宇等至。皆反戈而迎。世藩入安平鎮。請世襲。待之如初。襲委罪於其僕蔡雲。雲自縊。收殺蕭拱宸、李應清。曾從龍等。餘皆不問。諸將營兵撥守汛地如故。十一月世藩率周全斌等同其叔世襲回思明州。後世襲入京歸命。授精奇呢哈番。顏夫人鄭芝豹自戍所發回。准在京同住。

明 康熙二年 海上稱永曆十七年

正月世藩駐思明州。時洪旭守思明。鄭泰守金門。黃廷守銅山。世藩得鄭泰與黃昭往來書。欲襲取之。泰不自安。稱病不見。三月命周全斌督船入海澄港取糧。欲襲金門。見其有備乃止。四月參軍陳永華謀以世藩將回東甯。詐徵鄭泰爲居守戶官。統轄諸鎮。資其餉給兵。鑄居守戶官印。遣吳慎費至金門。泰使弟鳴駿入謝。世藩

慰諭之。見陳永華情款甚篤。鳴駿回力勸兄行。泰遂於六月初六日。帶兵船并餉銀十萬至思明。是晚入城赴席。世藩以通書黃昭事面質之。遂交與洪旭監留。周全斌率兵并其船。獨蔡璋一船走脫。天未明。至金門。鳴駿倉卒與泰之子續緒率將士八千餘人。向總督李率泰投誠。全斌追之不及。鳴駿等至京。俱受封。泰聞之自縊。七月。以黃而輝子廷之爲思明知州。八月。自鄭鳴駿降後。人心解散。鎮營多叛。武職楊富等。文官陳彭等。皆先後投降。九月。紅夷糾集甲版船十六隻。夷人數千。會靖南王。李總督。約同攻兩島。候事定之日。求梧嶼築城貿易。如廣東香山口例。後准市十月。李總督定議。調陸路提督馬得功。督鄭鳴駿等出泉州港。水師提督施琅。同海澄公黃梧出海澄港。靖南王耿繼茂。同荷蘭國紅夷紮營於同安之劉五店。刻期渡海。守高崎正兵鎮陳昇先約降。十一月。世藩率周全斌等會兵船於金門。紅夷船高而大。一船有大小煩銃千餘號。橫絕中流。是日礮聲如雷。自辰至酉。相續不絕。世藩見勢不敵。乘潮退出梧嶼。周全斌等十三號船在後。迫於潮長不得出。遂遠夷船

之後。衝大鯨而入。夷船發煩齊擊。無一中者。馬得功坐鳴駿中軍船。全斌以爲鳴駿也。直前攻之。值黃廷中軍將吳朝宰。世藩之親軍蕭乘龍。前後夾攻。揮兵過船。得功親隨鐵甲精兵三百人。皆被殺下水。得功頓足投水死。再攻楊富船焚之。富亦投水。遇救得免。所遇之船。多被攻沒。遂揚帆直出。日暮收兵。而海上不知馬得功之死。竟棄兩島。退守銅山。清兵入島。島中民尙數十萬。多遭白刃。投誠兵復肆殺掠。其地遂空。

甲辰康熙三年 海上稱永歷十八年

正月。世藩駐銅山。諸軍乏糧。周全斌率衆投誠。入京封伯。洪旭以杜輝守南粵。輝亦掠其輜重投誠。三月。世藩率衆回東甯。工官馮澄世一船。爲家丁所迫。赴海死。洪旭以二十舟候黃廷同行。而廷部下將士多不願行。遂率衆投誠。八月。清議取臺灣。遣施琅掛靖海將軍印。卽以周全斌副之。整舟師候風開洋。

乙巳康熙四年 海上稱永歷十九年

四月。清官軍船出洋。颶風大作。各船飄散。不能相顧。皆引還。未幾。召施琅入京。其降將多敘用。

丁未康熙六年 海上稱永歷二十一年

部議分撥海上投誠官兵。移駐外省。召周全斌入京歸旗。其標下官兵及別鎮兵。各給行糧。分駐各省屯墾荒田。給以牛種。免其六年租稅。其將領或督墾。或撥各衙門効用。文官赴部候補。

己酉康熙八年 海上稱永歷二十三年

世藩在東甯。以陳永華理政。馮錫範管侍衛。劉國軒等管兵。忠振伯洪旭病故。其子磊。及永華之姪繩武等。俱任用。改天興萬年二縣爲州。置鳳山、諸羅二縣。課耕種。安撫土番。貿易外國。通魚鹽。向之憚行者。今皆爲樂土焉。清遣官渡海招撫。世藩請照朝鮮國例。不剃頭。不登岸。議竟不成。

癸丑康熙十二年 海上稱永歷二十七年

十一月。吳三桂反。陷雲南、貴州、四川、河南、岳州。諸郡縣僞稱大周元年。初。平南王疏請歸老遼東。留子之信襲職鎮守。許之。并令舉家歸旗。時平西、靖南相繼疏請。俱報可。至是平西反。乃命二王仍留鎮。時耿繼茂死。精忠嗣王。三王交通逆命。反謀決矣。

甲寅康熙十三年 海上稱永歷二十八年

三月十五日。耿王傳諭各官入府議事。總督范承謨、巡撫劉秉政至。伏甲士執之。知府王之儀、同知喻三畏、走出被殺。拘承謨於獄。以秉政爲統制使。鄉官蕭震爲布政使。自僞稱總統兵馬上將軍。移檄各府縣。俱望風而降。十九日。檄至泉州。提督王進功縱兵焚劫。傳檄所屬皆降。興化鎮馬惟興、守備郭惟藩、乘機劫掠。獨同安城守張學堯、晉江水師李尙文、所部無犯。初。耿王將拒命。遣王鏞往見世藩。請以舟師由海道出江南。而已統兵出浙江。鏞回言海上船不滿百。兵不滿萬。耿始輕之。駐防漳海道陳啟太合家殉節。漳浦鎮陳炎、海澄鎮趙得勝、俱降耿。福甯鎮吳萬福、貪尅失將士心。謀拒耿。衆不從。耿遣曾養性督兵至。誘殺萬福。乘勝長驅。溫、處二府



俱下。四月。潮州總兵劉進忠降耿。耿召王進功至。留之而徵其兵。調張學堯鎮泉州。化尙蘭守同安。世藩遣柯平至閩。耿謾詞以應。由是遂隙。世藩侍衛馮錫範。同劉國軒。率舟師至廈門。耿王徵各路兵出關。黃芳度遣黃翌引千人應命。趙得勝陰約降於世藩。不受耿令。世藩兵至同安。尙蘭迎降。質張學堯家眷。學堯亦降。五月。世藩至思明州。以趙得勝爲左提督。張學堯爲左先鋒。化尙蘭爲仁武鎮。耿王聞同安之失。遣王進引千人入守泉州。而提標五營兵將不肯應調。王進至。與城守賴玉相結納。用提標守備戴國用爲爪牙。勒王進功家口入省。耿王遣兵接應。兵將至。而進功之子錫璠。與其屬楊青等議。誘賴玉。戴國用。李尙文等。執之。率兵攻王進。進走登塗門樓。意氣自若。提標兵無統帥。相持竟日。進恐海船至。更深。整隊出城而去。六月初三日。錫璠等殺賴玉。分其屍。絞殺戴國用。釋李尙文。迎世藩入城。以錫璠爲指揮使。暫理提督軍務。黃芳度殺漳州城守劉豹。豹。耿所署也。芳度遂降世藩。而差人間道。賫密疏入京。七月。平南王遣兵圍劉進忠於潮州。耿王不能援。

進忠求救於海上。世藩遣金漢臣率舟師援之。以進忠爲右提督。九月。耿王復遣王進率兵三萬攻泉州。至惠安。肆行焚掠。世藩命劉國軒督諸鎮及五營兵拒之。對壘逾旬。進退屯楓亭。列營二十餘里。十月。國軒兵至塗嶺。嚴陣會戰。王進見前陣皆新募之兵。直前擊之。兵皆懼怯死鬪。國軒令許耀分兵攻其後。焚其營壘。進兵大敗。十一月。吳三桂遣周文驥來和解。劉炎在漳浦。不肯從。世藩密請救於耿。耿遣兵往援。世藩檄黃芳度擊走之。耿復遣親軍都尉徐鴻弼走間道入漳浦。世藩以馮錫範、趙得勝督諸軍攻之。炎、鴻弼會雲霄鎮劉成龍合兵戰於羅山。右虎衛何祐擊之。炎等大敗走回城。馮錫範以紅夷衝天礮攻城。炎等大懼。同鴻弼、成龍出降。十二月。趙得勝督軍援潮州。大破平南兵於黃岡。潮圍始解。世藩分設六官。以陳永年爲總制留守。兼管勇衛。馮錫藩爲侍衛。二衛皆親軍。薛進忠爲左武衛。劉國軒爲右武衛。何祐爲右虎衛。以施福爲五軍。其左右先鋒及諸鎮營皆聽五提督調遣。凡文武事宜皆贊畫參軍陳純武侍衛馮錫範主之。初。世藩之來思明也。兵餉取

給於東甯。洪磊承其父旭遺命。助餉銀十萬兩。至是兵多餉少。乃以六官督比紳士富民以充之。以鄭省英爲宣慰使。總理各府縣錢糧。百姓年十六以上。六十以下。每人月納銀五分。名曰毛丁。船計丈尺納稅。名曰樁頭。及設各府鹽引。分管鹽場。以給兵食。

乙卯康熙十四年 海上稱永歷二十九年

正月。耿王遣使賀正議和。送船五隻。世藩遣使報聘。約以楓亭爲界。自是二家交好。二月。永春寨民呂華不服徵派。薛進忠圍之。三月不下。知縣鄭時英諭之出降。釘殺之。家族發淡水充軍。續順伯沈瑞駐饒平。劉進忠攻之不下。廣兵來援。何祐遇之於百子橋。擊走之。瑞出降。傳流洪經略之姪士昌、天倫、天恩及眷口於東甯之狼嶠。流前進士楊明琅及眷口於狼嶠。以其過懷宗梓宮不下馬。其父修南安縣誌。以海上爲海寇故也。後皆死於戍所。五月。劉進忠請大師南下。從之。初六日。世藩入海澄。遣鄭斌入漳。慰諭黃芳度。或東兵入見。或率兵隨征。芳度不受命。密調回黃

聖之兵。耿王召之。亦以疾辭。劉國軒率諸鎮兵至潮。與進忠規取屬邑之未下者。安達公尙之信悉力守禦。相持日久。糧乏兵病。之信調十餘萬衆。盡銳來攻。國軒自新墟一日一夜退至紫母山。以解糧露載車上。宣慰使洪磊懸金以待有功。軍心稍定。進忠與國軒議曰。之信大軍必從小路而來。出我不意。須得勁將扼之。惟何祐可任。然不可明言其故。恐其心怯。子可嚴陣以待。而予將兵馬背城以爲應援。國軒從之。是夜大路上敵營中火光點點。進忠放大礮擊之。見火光不動。進忠曰。是空營也。吾兵可安寢以待。次日。之信率兵從小路而來。何祐見大隊突至。欲退不可。冒死奮勇以鬪。無不以一當百。之信大敗退走。國軒等日夜追之。殺死者不計其數。是役也。以飢卒數千破數萬之衆。由是何祐之名振於粵東。祐綽號何錐子。六月。世藩自海澄移檄萬松關。黃芳度令其下俱剃髮據守。令其兄芳泰入粵請援。世藩進攻不利。其將萬宏登梯中礮死。乃築長垣圍之。調何祐攻平和縣。守將賴升降。諸屬縣皆下之。十月。海澄公標將吳淑以漳州降。初淑投誠。屬公標下。黃梧待之厚。將死。囑

之曰。吾子年少。君可保全之。及被圍日久。謂其弟潛曰。吾本海上舊將。公雖待吾厚。吾負罪於先藩實深。今世藩待吾眷屬。恩尤有加。吾不可以負之。遂以初六日開城。兵入。芳度投井死。擒其將黃翌、朱貴等。殺之。沒其家。剖黃梧棺。戮屍斬首。及芳度首。揭竿以徇衆。世藩以吳淑爲右提督。十一月。令人往日本取回鄭太所寄之銀。凡七十一萬。止得二十六萬而還。

西曆康熙十五年 海上稱永歷三十年

正月。世藩以右虎衛許耀、前衝鎮洪羽等。率舟師會在潮諸軍。攻取廣東州郡。二月。平南王尙可喜昏病日甚。會僞周師克肇慶韶州等處。廣州人人自危。駐潮諸軍聞報。燒營遁回。劉國軒、何祐、劉進忠等。分南北兩路而進。碣石苗之秀軍程鄉。其妻在汛。遣人迎降。之秀納降款。世藩令其回鎮碣石。圍惠州。攻博羅不下。旋下長樂龍門諸縣。之信窮蹙。因乞降於僞周。周封爲輔德公。令其讓惠州於海上。之信檄提督等撤守兵回廣。遣使餽弓馬幣帛通好。乃以國軒鎮惠州。東莞守將張國勛亦降。以

爲後勁鎮。自是與周分界而守。五月。耿王調汀州鎮守。劉應麟兵出關。麟不從。密來通款。乃遣吳淑提兵馳書與耿王言。欲假道於汀州。耿王遣兵防城。麟懼其圖己。率所部出掠瑞金石城等處。吳淑兵至。麟與謀攻城。下之。以應麟爲口提督。耿王檄曾養性等。自温州航海入閩。朱大貴以舟師來降。其餘逃入福州。奇兵鎮黃應選擊之。獲巨船數千號。七月。調劉進忠出師。進忠稱疾不行。進忠自潮州定後來見。世藩待之禮意疏略。見左右用事者皆碌碌。知不與有爲。及改汀州。悔失計。至興甯。與諸將不協。流言日起。遂稱病回潮。陰爲自守之計。九月。耿王師出浙江者。爲總督李之芳所扼。多被摧敗。京中遣和碩康親王提兵乘機入閩。兵出江右者。爲總督蔡毓榮及滿州兵移駐防兵拒之。失廣信。棄建昌。大勢已去。又聞汀州不守。益憂內顧。諸將遂密謀。詐作耿王投誠獻關。耿王聞變。收王進。范承謨。蕭震。絞殺之。欲乘船奔海。爲都尉徐文耀所脅。不得出。遣王進功回泉取救兵。密囑曰。吾忍死以待也。延津已失。不得已於十九日剃頭。迎康親王入城。耿王至京。與徐文耀及諸將領皆伏。

誅。興化守將馬成龍以城降。令許耀率兵守之。十月。許耀進兵福州。駐師烏龍江。驕縱飲酒。諸將不服。清兵渡江。或請於半渡擊之。不從。既登岸。倉皇出戰。敗走。十一月。邵武守將獻款於吳淑。淑赴之。移兵據守。十二月。清兵至邵武。吳淑禦之時。大雪嚴寒。諸軍涉溪拒戰。凍壞不能走。退紮汀州。清兵至建甯。薛進思守汀。聞之。警懼失措。劉應麟願傾貲餉兵固守。進思猜疑不從。棄城而走。麟奔潮州。依劉進忠。發病而死。平南王尚可喜於九月病故。之信遣使報訃。并請其妹奔喪。妹沈瑞之叔母也。許之。并遣使弔喪。僞周封之信爲輔德親王。

丁康熙十六年 海上稱永歷三十一年

正月。清兵至興化。時諸將銳氣已喪。何祐又與得勝不睦。得勝出戰。何祐坐視不救。致得勝力戰而死。何祐奔回泉州。二月初九日。清兵至泉州。守將林定無備。城破。標將林孟參宿營謝貴死之。林定素與民相安。逃於民間。剃髮走免。諸軍潰散。十九日。清兵至漳。世藩倉皇登舟。至海澄。棄而不守。至廈門。欲回東甯。百姓號泣攀留。

角宿營吳桂整兵防守。衆賴以守。祭趙得勝。斬薛進思。許耀。網責數日而死。何祐、吳淑、戴罪自效。命諸將眷口搬回東甯。王進功、沈瑞、張學堯、陸續起行。劉炎投誠。至京。流甯古塔。三月。諸將聚集思明。餉不給。乃分汛屯紮。措餉召募。漳浦巫者朱寅、詭稱三太子。聚海上殘兵二百餘人。夜襲泉州。攀堞而入。鳴鼓揚旗。守兵以爲海兵復至。發一大礮。寅乃抽回兵。出城而去。人以爲神。附者日衆。屢屢取勝。蔓延於漳泉之間。首裹白布。時人謂之白頭賊。六月。劉進忠獻款於僞周。後投誠。殛死。劉國軒守惠州。尙之信已投誠。孤城難守。乃率所部航海而歸。清封黃芳世爲海澄公。僞周將韓大任守吉安。清兵圍之經年。無援。乘夜潰圍走入閩界。旣以糧盡投誠。後從征噶爾旦。衝陣而死。康熙王遣漳泉二府知府。照朝鮮例。從海上招撫。海上不從。十二月。清兵圍吳淑於天成寨。朱寅率衆來援。吳淑突圍而出。

午戌康熙十七年 海上稱永歷三十二年

正月。泉州提標兵巡界。與海上將陳陞遇。擊破之。二月。以劉國軒爲中提督。總督



諸軍。後提督吳淑副之。初十日。國軒督軍攻玉川。守將劉宗降。三日。河福濟皆下。十八日。進取江東橋。清守將王重祿、呂賴等潰。遂燒斷橋梁。以絕援兵。漳州援兵至。國軒分兵擊敗之。三戰三捷。軍聲大振。二十三夜。取石碼。獲清守將劉口、楊朝宗。遂軍於祖山頭。清副都統孟安等自潮來援。國軒退屯石碼。築垣拒守。仍分屯漳州郭外。清提督段應舉自泉州來。甯海將軍喇哈達自福州來。平南將軍賴哈自潮州來。先後應援。國軒倏水條陸。滿漢疲於奔命。三月初一日。國軒列陣郡城之東赤嶺。清兵背城逆戰。前虎衛林陞一軍當其鋒。殺傷相當。朱寅率兵按天寶山。以牽漳州之勢。黃芳世擊敗之。寅遁入長泰。國軒樹柵雙橋一帶。離漳數里。滿漢諸將會議。以一股同黃芳世紮水頭小灣腰樹。一股紮鎮門安礮。以斷其往來水路。國軒偵知之。十一日黎明。焚營撤兵。漳州意其遁也。少頃。舉帆直抵水頭登岸。涉嶺進戰。芳世素不知兵。又與漢將不協。吳淑攻之。戰敗墜馬。遇救得免。走入漳州。病月餘死。自水頭之敗。海澄餉道阻絕。段應舉會綠旗兵及滿州將軍兵數萬。列營祖山頭。

十八日下午。國軒兵至。應舉以兵迎敵。爲何祐殺退。江勝、吳淑等。遶出祖山之背。國軒督勁卒登山。衝滿州兵。滿兵敗走。其衆大潰。國軒又以勁兵截漳州大路。滿漢兵棄輜重。自相踐踏。奔入海澄。國軒夜令軍士鑿塹。每人一丈。引江水環城。遶之外。又鑿溝數里。沿堤兩岸。安銃守之。由是內外阻絕。是月初三日。吳三桂僭號於衡州。以周爲國號。改元昭武。四月。朝命總督郎廷佐入京。以布政使姚啟聖代之。勒巡撫楊熙致仕。以按察使吳興祚代之。調江南提督楊捷代段應舉。援兵四集。屯筆架山以救海澄。五月。劉國軒以筆架山南小寨。懸崖狀如掛燈。俗呼燈火寨。下臨大溪。順流可通海澄。問誰可抗守。吳淑請往。乘夜率兵進寨。天明。寨柵完備。初十日。滿營發礮攻擊。連夜不絕。淑令軍士穴地藏身。無死傷者。馳報國軒。以爲乘夜礮意不在寨。當別防之。信至。滿漢兵齊至祖山岳嶺。破林彪、張鳳二營。鳳戰死。進攻林陞營。國軒援兵至。姚啟聖之子姚義統領韓大任降兵。以牛載土囊填溝。至第三重。國軒發大礮齊擊之。死者無數。滿漢兵多填於塹。遂退。時。京中傳上諭有能救

海澄者。及城中兵將有拔圍而出者。皆重賞。奈國軒鑿塹通潮。圍至數重。不可復救矣。六月初十日。國軒攻入海澄城。段應舉、穆伯、希佛、自縊。黃藍不知所終。獲孟安、馬虎等。滿漢官三十餘員。皆釋之。授官給俸。滿兵千餘。遷之東甯。時城中滿州披甲二千。馬八千餘匹。綠旗兵與城守兵。計二萬餘。圍八十三日。糧盡。殺馬而食。馬盡。屠馬骨而食之。死亡及泐水而出過半。閩省震恐。諸援兵退守漳州。朱寅下海。封爲蕩寇將軍。改名蔡元義。歲餘病死。劉國軒議乘虛攻泉州。令吳淑分兵下長泰縣。國軒兵至同安。都統大雅里走泉州。擒鄉兵總黃朝斬之。與何祐、江欽、楊欽、十數騎離隊伍至泉州城。循清源山。於東嶽廟相視營地。城中兵不敢出久之。隊伍始至紫營於城外。城中兵終不敢出。七月。國軒水陸並進。江欽攻南安。殺守將。諸縣守兵相繼棄城而走。遂取南門銳城。載龍煩及大銃數十號。攻南門。城崩壞數十丈。盡爲平地。城內再築短牆以守。清城守馬勝等以釘釘船板鋪於地上。兵入城無蹕足處。損傷甚多。會天大雨。城竟不拔。圍泉兩月。援兵四至。將軍喇哈達從漳平間道出。

安溪。巡撫吳國祚、同浙右提督、由白鶴嶺出永春。江南提督楊捷、由廣橋進河市。皆未敢向前。清提督調水師林賢、黃皓等、出閩安鎮。遙爲聲援。八月。水師提督蕭琛守定海。林賢等舟師至。琛戰船不先期整頓。議以舟寡且小。欲據上流牽制之。水師五鎮章元振欲先發制人。率所部十舟進戰。林賢等共擊之。衆寡不敵。阻風逆流。一軍盡沒。被擒入福省殺之。蕭琛不設備。遇敵大潰。退艤海山。遂妄報福水師大至。世藩遂令國軒退兵守思明州。國軒於二十四日退兵下船。隔三日。城中兵始敢出。世藩召回蕭琛斬之。以援勦左鎮陳諒。後鎮陳啟明督朱天貴等水軍防禦北船。僞周主吳三桂病死衡州。孫世璠立。其姪應奇守岳州。驕而且貪。清兵攻之。棄城而走。於是湖廣雲貴皆不守。遂亡。九月。劉國軒入江東橋。至長泰。滿漢兵遇之皆披靡。乘勝長驅。至耿精忠營衝之。馬中礮。掀國軒墜地。有滿州披甲前蒙國軒放免。至是乃以騎授之得脫。滿將知而殺之。國軒守汊河。列營觀音山。十月。時漳泉屬縣盡棄。惟姚啟聖等欲得海澄。乃令人往議和。海上不從。

己康熙十八年 海上稱永曆三十三年

正月。劉國軒請停文武俸。自出糧餉。兵三月從之。三月。姚啟聖以果堂寨逼盡江東橋。欲發兵據守。國軒偵知。令吳淑據其寨。漳兵至。敗之。自定海失守。以朱天貴守海壇。陳諒爲水師總督。於二十九日早。各船乘南風迅發。進泊定海。福州集船百餘號。由五虎門出。陳啟明、朱天貴率煩船直衝而入。連破十餘船。獲大船一隻。值大風暴起。福船收入五號。海船收船海壇。四月。陳永華請克驛監國。號監國世孫。六月。鄭時英駐東石督餉。欲掘沿海鹽埕。則利盡歸於我。乃令楊忠率兵往潯尾。舍舟登岸。連掘兩晝夜。俄而大隊兵至。四面合攻。忠力戰而死。餘衆死亡過半。七月。國軒築潯尾寨。一夜而成。同安兵至。擊走之。由是同安船不敢出。初。右武衛林陞汛守東石。取給軍餉。及楊忠敗死。林陞調兵隨征。僅以散卒三百人委施廷。陳申守之。有叛兵入泉報知。城中發兵四面環攻。施廷被創。陳申戰死。寨破。兵民赴海死者過半。清兵仍築三寨以守。十月。國軒離漳城五里而軍。時援漳滿漢兵十餘萬。國

軒亦有萬餘。營壘咫尺相望。指揮自如。諸軍畏之如虎。國軒以果堂扼要。初八日。率兵就果堂復版尾地方。再築一寨。初九日。滿漢將軍提督以兵數萬齊至。銳不可當。國軒與吳淑、何祐、林陞、江欽引千餘勁卒奮勇死鬪。自午至申。敵皆退。斬章巴、石兒等死者無算。自是不復出。十一月。吳淑守版尾寨。清兵築壘環攻。礮聲不絕。淑處之自如。身被重傷。復染病。不以爲意。時值陰雨。淑踞牀而臥。牆傾壓死。世藩痛哭。以淑次子天駟爲建威左鎮。統其兵。十二月。姚啟聖、吳興祚、大集舟師攻廈門。題請浙粵水師尅期協攻。世藩調各洋船私船配兵北上。以右武衛林陞爲總督。左虎衛江勝、樓船右鎮朱天貴爲左右副總督。率諸軍禦之。

庚申康熙十九年 海上稱永歷三十四年

正月。水師提督萬正色督師出閩安鎮。撫院吳興祚率兵沿海援之。林陞分船三十號守海壇。自統六十號泊泉州臭塗灣。二月。萬提督至海壇。海船俱至泉州迎敵。萬提督至圍頭。朱天貴以七船衝其鋒。所向無前。俄而海風大作。萬提督乘風收入。

泉州港。沿海岸上安礮。整師防守。海上各船無所取水。乃退至金門。世藩所親幸施福。密通姚啟聖。欲爲內應。使投降兵數百人。挈眷來歸。欲乘機舉事。國軒諜知之。啟世藩收施福殺之。世藩議欲撥國軒兵三千。配小船直入泉州港。攻萬提督。使人持箭抽兵。時兵久已無糧。盡皆退潰。國軒禁不能止。海澄守將陳昌以城投誠。國軒至廈門。知勢不可爲。收拾餘衆下船。百姓遮道攀留。二十六日。兵變擄掠。世藩焚演武亭行營。盡率諸軍登舟。協理五軍吳桂。收敗卒據廈門以待清兵。二十八日。萬提督入思明州。二十九日。世藩至澎湖。朱天貴守泊銅山。姚總督招之。遂投誠。二月十二日。世藩至東甯。五月東甯有聲如驢鳴。半路店雨雹。大如鷄子。六月。總制陳永華晝坐。見衣冠甚偉者。曰。我行災使者。欲借公署三月。永華設席張樂宴之。未幾。永華死。承天府猪生子。四耳三目。前二足向上。令每田一甲。出壯丁一名。十月。劉國軒營中猪生子。猪身人面。十一月。白氣長數丈。見於西方。

康熙二十年 海上稱永曆三十五年

正月二十八日。世藩殂於承天府行臺。三十日。馮錫範、劉國軒調兵駐承天府。會六官議立嗣。董太妃與諸公子收監國印。克壑不肯與。擁兵自衛。公議以克壑乃乳母所生。姦生子也。非正嫡所出。乃縊殺之。妻陳氏亦自殺。二月初一日。董太妃率世子克壑襲位。時年十二。錫範之壻。百官朝賀畢。太妃起出位。諭以誅監國故。以世子付託馮、劉等佐。竭力匡扶。涕淚沾襟。衆心大慰。封馮錫範爲忠誠伯。劉國軒爲武平侯。大赦國中。以二公子聰爲輔政公。領護衛。三月。以五公子智爲右武驥將軍。募兵。四月。以三公子明爲左武驥將軍。募兵。五月。總督姚、巡撫吳、陸提諸水提萬題爲報明事。本年四月。臣等密探得僞藩病故。幼主嗣襲。文武解體。此天亡之時。不可失也。會同具題。請旨密示。臣等遵奉施行。六月十六日。董太妃薨。時協理刑官柯平已病故。陳繩武閒住。國事、錫範主之。兵事、國軒主之。八月二十八日。中軍營火。九月初三日。塗輕庭火。十月。賓客司傅爲霖、通清事發。逃亡。二十八日獲之。十一月。誅傅爲霖及高壽、陳國威等。盡殺其子弟。令沈瑞自經。家屬發配。



總督姚上疏請攻臺灣。力薦內大臣施琅可任水師提督。萬提督言臺灣難攻。且不必攻。朝命召見施琅。仍以靖海將軍充水師提督。改萬正色爲陸師提督。代諸遇。

壬戌康熙二十一年 海上稱永歷三十六年

正月。施將軍出京至閩。於廈門各處調兵整船。劉國軒以統船十九號。戰船六十餘號。兵六千人。撥諸將守澎湖。親身往來督視。施將軍請命專征。奉旨相機進取。十二月。承天府災。沿燒一千六百數十餘家。米價騰貴。民不堪命。

癸亥康熙二十二年 海上稱永歷三十七年

六月。諸將進攻澎湖。國軒禦之。列大礮架巨艦數十以待。諸將皆望風而逡巡。惟提標藍理、曾成、張勝、正黃旗侍衛吳啟爵、及游擊趙邦試、許英、阮欽、冒險深入鏖戰。海船齊出。已合圍。施將軍恐有失。急以坐駕衝入。內外合攻。敵小卻。將軍遂同七船隨流而出。時天色將晚。遂在西嶼頭洋中拋泊。十八日早。舟次於八罩。以收諸軍。國軒聞而喜曰。誰謂施琅能軍。蓋以澎湖數起大風。無三日晴朗。遇大風。舟立壞故也。

然停泊數日。浪靜無風。亦天意也。二十日早。穩至虎井。施將軍取小舟於內外塹時間。密覘形勢。於是再申軍令。嚴明賞罰。令總督陳蟒領船五十號。從東畔時內直入四角山。又令總兵董義領船五十號。從西畔內塹直入心灣。以爲疑兵。示若欲登岸者。將軍自率諸將士。部署大鳥船五十號。居中分爲八股排入。餘舟以次而進。以爲後援。指畫既定。俟風而發。二十三日巳刻。南風大發。波濤洶湧。諸船揚帆而進。風利舟快。瞬息飛騰。據其上流。乘勢奮擊。以一當十。又令火器船乘風縱發。煙燄漲天。海船相沿燒殆盡。國軒見勢敗。遂乘小舟逸去。清前鋒林賢、諸天貴亦戰死。國軒旣敗。羣情洶洶。施將軍又厚撫降卒以誘之。於是莫不解體。世子與錫範、國軒相對泣曰。民心旣散。誰與死守。惟有求撫之計耳。於是乞撫不許。世子又令人求撫云。惟命是聽。明甯靖王術桂投繯而死。施將軍令侍衛吳啟爵等宣布德意。於是俱剃頭歸順。侍衛還報。將軍喜曰。不勞王師而傾國效順。朝廷之福也。卽令侍衛馳驛入奏。并繳歸誠册印。九月初六日。侍衛至京。朝廷召見。特加慰勞。因問澎湖克

捷事情。侍衛披圖指畫。備言將士用命血戰之苦。上爲之揮淚。因口諭部臣。閩師遠涉海島。比滇黔陸路不同。論功再加一等。上又問歸降事。對曰。僞主年幼未諳。國事盡委馮劉。馮懦而無斷。國軒傾心歸命。可保無他虞。上又問臺灣形勢。條對甚悉。上問提督重兵入險有慮否。對曰。海上旣敗之餘。無與共亂者。但恐總督遲至。議論不一。或至中變耳。若總督與提督能一心共濟。事可萬全。今提臣係督臣保舉。必無異心。指日可定。如謂奔敗之餘。再奮螳臂。敢拒巨轍。必無之理。上悅。自解所御龍袍。并賦詩以賜提督。加授靖海將軍。封靖海侯。以示酬庸焉。八月十五日。施將軍統率大帥至臺灣。百姓壺漿相繼於路。海兵皆預製清朝旗號。以迎王師。十月十七日。侍衛自京回至軍前。卿命中告軍民莫不以手加額。部議以臺灣番民雜處。山海要津。設總兵一員。副將二員。統水陸官兵一萬鎮守之。設道官一員。一府三縣。以統治百姓及番衆。府曰臺灣府。附郭爲臺灣縣。南路爲鳳山縣。北路爲諸羅縣。建置旣定。經畫事竣。十月。世子與馮、劉、何、併眷口登舟。十一月初六日。至泉州。初七

日。從省進京。十二月。總督姚啟聖病故。克塽至京。封爲漢軍公。弟克舉。准開牛  
象。叔鄭聰等。俱食三品五品官俸。隨旗。馮、劉、俱封伯。國軒隨補天津衛總兵。其子准  
開牛象。

自丁亥永曆元年起至癸亥永曆三十七年止海上始末俱載於此以備採擇焉  
取臺灣一節行文多以敘事而又多載諸人口中語與本錄是兩樣筆今兩存之

是書爲金山錢鱣菴先生熙泰所藏向無刊本先生後裔選之茂才慨假錄副俾付印刷藉以流傳全書行款悉仍原式間有疑義亦不敢竄易所以存舊也校者跋

辛亥年十月初版



校訂者  
印行

商務印書館

印刷所

上海北河南路北首寶山路  
商務印書館

總發行所

上海四馬路中市  
商務印書館

(補史上海上見聞錄二冊)  
第十四種  
(每部定價大洋貳角伍分)

